



部  
釋  
加  
譜

卷之三  
四



|      |
|------|
| 柳田文庫 |
| 文庫11 |
| D 62 |
| 2    |



文庫11  
D 62  
2

釋迦譜卷第三

蕭 齊

釋 僧

祐

撰

釋迦降生釋種成佛緣譜第四之三出因果經  
爾時太子既出宮已至於天曉耶輸陀羅及諸姝女  
從眠而覺不見太子悲號啼泣即便往啟摩訶波闍  
波提今日忽失太子莫知所在摩訶波闍波提聞是  
語已迷悶躡地如是展轉乃至逢王王聞此言屹然  
無聲失其精魂若喪四體舉宮內外皆亦如是時諸  
大臣即入檢視太子住處案行宮城見城北門自然  
已開又復不見車匿犍陟即問門司誰開此者互相

支那

釋迦譜卷三

一

書三

010190551593

48-12456

推檢皆云不知并問防人亦云不解此門開意于時大臣心自思惟北門既開太子必當從此而出宜速尋覓太子所在即勅千乘萬騎絡繹四出追求太子以天力故迷失道徑不知所之即便還歸白太王言推尋太子不知所在爾時車匿步牽犍陟及莊嚴具悲泣嗚咽隨路而還舉邑人民見此驚愕無不懊惱悉皆競來問車匿言汝送太子置於何處今與犍陟而獨還也車匿既得諸人問此倍更悲絕不能答之此諸人民雖見犍陟鞞帶鞍勒七寶莊嚴不見太子猶若死人飾以華綵於是車匿前入宮城犍陟悲嘶

諸廐羣馬一時哀鳴外諸官屬白摩訶波闍波提及耶輸陀羅言車匿唯與犍陟俱還聞此言已宛轉于地而自念曰今者唯聞車匿犍陟相隨俱還而不聞道太子歸聲摩訶波闍波提即作是言我養太子至年長大一旦捨我不知所在譬如果樹結華成實臨熟落地又如饑人遇百味饌臨欲食之忽然翻倒耶輸陀羅又自言曰我與太子行住坐臥不相遠離今者捨我莫知所趣古昔諸王入山學道皆將妻子不暫相棄世間之人一遇相識別不相忘夫妻之情恩愛之深而乃反更如是之薄語車匿言寧與智者而

作怨讐不共愚人以為親厚汝癡頑人盜送太子置於何處今此釋族不復熾盛又責捷陟汝載太子出此王宮近去之時寂然無聲今者空返何意悲嘶爾時車匿即便答言勿責於我及以捷陟所以者何此是天力非人所為當於爾夕夫人姝女皆悉眠臥太子勅我令起鞍馬我於爾時以大高聲而諫太子欲使夫人及諸姝女聞此驚寤及鞍捷陟都無覺者城門每開聞四十里當爾之時自然而開又無一聲如此之事豈非天力出城之時天令諸神手捧馬足并接於我虛空諸天隨從無數我當云何而能止也時

天既曉行三踰闍那至彼跋伽仙人住處又復有諸奇特異事願聽我說太子既至跋伽仙人苦行林中即便下馬手撫馬背并勅於我令還宮城我於此時隨從太子永無歸意太子見遣終不聽往又復就我取七寶劍而自唱言過去諸佛為成就阿耨多羅三藐三菩提故捨於飾好剃除鬚髮我今亦當依諸佛法唱此言已即脫寶冠及以明珠悉付我還置王足下又以瓔珞與摩訶波闍波提餘莊嚴具以與耶輸陀羅我於爾時雖聞此誨猶侍左右無有歸情于時太子便以利劍自剃鬚髮天於空中隨接而去即便

前行逢於獵者以身所著七寶妙衣而與獵人貿易  
 袈裟於是虛空有大光明我見太子形服既變深知  
 其意必不可迴我即悶絕心大懊惱太子前至跋伽  
 仙人所住之處我便於彼辭別而歸此諸奇特皆是  
 天力非復人事願勿責我及捷陟也時摩訶波闍波  
 提及耶輸陀羅既聞車匿說此事已心小醒悟默然  
 無聲

爾時白淨王悶絕始醒勅喚車匿而語之言汝云何  
 令諸釋種姓生大苦惱我有嚴制勅內外官屬守護  
 太子畏其出家汝復何意輒送太子置於何處車匿  
 怖懼而啟王言太子出城實非我咎唯願大王聽我  
 具說即以寶冠及髻中明珠置王足下太子令我以  
 所冠珠置王足下七寶瓔珞與摩訶波闍波提餘莊  
 嚴具與耶輸陀羅王見諸物倍增悲絕雖復木石猶  
 尚有感况乃父子恩愛之深車匿具以前事而啟王  
 言太子勅我父王若謂本要有子當聽出家今未有  
 子云何而去臨去之時又不啟者汝可為我具答父  
 王耶輸陀羅久已有娠王宜問之昔勅如此非為專  
 輒王聞此言即便遣問耶輸陀羅太子云汝久已有  
 娠實如此不耶輸陀羅即答信言當於大王來此宮

時太子指我即覺有娠王聞其語生奇特心憂惱暫歇而自念言我前所以許令有子聽出家者七日之中必無子理轉輪王位自然而至不謂七日未滿而便有娠深自咎悼智慧淺短所為方便不能住之輕作此約重增悔恨太子神略出人意料今日之事亦復兼是諸大天力我今不應責車匿也時白淨王心自思惟太子出家必不可迴設使更作諸餘方便亦不能留雖復棄國出家學道然已有子不絕種嗣我今應勅耶輸陀羅好令將護所懷之子時白淨王愛念情深語車匿言我今當往尋求太子不知即時定

在何許其今既已捨我學道我復何忍獨生活也便當追逐隨其所在爾時王師及與大臣聞王欲出尋求太子二人俱共來諫王言大王不應自生憂惱所以者何我觀太子見其相貌過去世中久已修習出家之業設復令為釋提桓因亦當不樂況復今者轉輪王位而能留也大王不憶太子初生而行七步舉手住言我生已盡是最後身諸梵天王釋提桓因悉來下從如此奇特云何樂世又復白王阿私陀仙人昔相太子年至十九出家學道必當成就一切種智今時既到太王何故而生愁苦又復太王嚴勅內外

守太子慮恐出家而諸天來導引出城如是之事  
非復人力唯願大王當生歡喜勿懷愁惱不須自出  
若憶太子猶不已者我今當與大臣尋求所在王聞  
此語心自念言我知太子雖不可迴未忍便捨不復  
追之今當試令師與大臣更一尋求也即便答師及  
大臣言善哉可去舉宮內外心皆苦惱佇遲速還於  
是王師大臣即便辭出追尋太子爾時白淨王發遣  
王師及大臣已即以太子瓔珞與摩訶波闍波提而  
語之言此是太子所服瓔珞付車匿還今以與汝摩  
訶波闍波提見瓔珞已倍增悲絕而自念言四天下

人極爲薄福失此明智轉輪聖王又送餘莊嚴具以  
與耶輸陀羅而語之曰太子以此嚴身之具令持與  
汝耶輸陀羅既見此物悶絕躡地王又遣人勅耶輸  
陀羅令自愛敬無使胎子不安隱也

爾時王師及以大臣至跋伽仙人苦行林中除去從  
人及諸儀飾便前仙人所住之處仙人請坐互相問  
訊於是王師語仙人言我是白淨王師今所以來至  
於此者彼白淨王足相太子厭惡生老病死之苦出  
家學道路由此林大仙見不跋伽仙人答王師言我  
近於此見一童子顏容端正相好具足來入此林共

我議論遂經一宿不知乃是王之太子鄙薄我等所  
 修之道從此北行詣彼仙人阿羅邏迦蘭爾時王師  
 大臣聞此言已即便疾往彼仙人所而於中路遙見  
 太子在於樹下端坐思惟相好光明踰於日月即便  
 下馬除却侍衛脫諸儀服前太子所坐於一面互相  
 問訊於是王師白太子言大王見使尋求太子欲有  
 所說太子答曰父王勅汝欲何所道王師答言大王  
 久知太子深樂出家此意難迴然王於太子恩愛情  
 深憂愁盛火常自熾然須太子歸以滅之耳願便迴  
 駕還返宮城雖有物務不令太子令棄道業靜心之

處不必山林摩訶波闍波提耶輸陀羅內外眷屬皆  
 悉沒於憂惱大海思太子還而拯救之  
 爾時太子聞王師語以深重聲答王師言我豈不知  
 父王於我恩情深也但畏生老病死之苦是以來此  
 為斷除故若令息愛終日合會又無生老病死苦者  
 我復何為來至於此我今所以違遠父王欲為將來  
 和合故耳父王憂愁大火今雖熾然我與父母唯餘  
 今生有此一苦將來自當永絕斯患若如汝言令吾  
 處宮修道業者如七寶舍滿中燄火當有人能止此  
 室不如雜毒食設有饑人終不食之我既棄國出家



修道云何令我復還宮城修學道也世間之人在太  
 苦中為小樂故尚復耽湎不能暫捨況我在此極寂  
 靜處無諸患苦而能棄捐還就於惡古昔諸王入山  
 學道無有中路還受欲者父王若欲必令我歸便是  
 違於先王之法爾時王師白太子言誠如太子今之  
 所說然諸先聖一言未來定有果報一言定無此二  
 先聖尚不能知未來世中必定有無太子云何欲捨  
 現樂而求未來不定果報生死果報尚不可知決定  
 有無云何乃欲求解脫果唯願太子便還宮也太子  
 答言彼二仙人說未來果一者言有一者言無皆是

疑心非決定說我今終不隨順彼教不應以此而見  
 難詰所以者何我今不為希慕果報而來至此以目  
 所見生老病死必應經之故求解脫免此苦耳今汝  
 不久見我道成我此志願終不可回還故父王說如  
 此也

爾時太子作此言已即從座起與王師大臣辭別北  
 行詣阿羅邏迦蘭仙人于時王師大臣見太子去啼  
 泣懊惱一者念太子情深二者奉受王使來太子所  
 而復不能移轉其意徘徊路側不能自反互共議言  
 既被王使而無力効今者空歸云何奉答我等當留

所從五人聰明智慧心意柔軟為性忠直種族強者  
密令伺察看其進止作此言已顧瞻其傍見憍陳如  
等五人而語之言汝等悉能留止此不五人答言善  
哉如勅進止去來當密伺察即便辭別趣太子所王  
師大臣還歸宮城

爾時太子往彼阿羅邏迦蘭仙人住處度於恒河路  
由王舍城既入城已諸人民眾見太子顏貌相好殊  
特歡喜愛敬舉國皆悉奔馳瞻視如是誼譯徹頻婆  
娑羅王王便驚問此是何聲諸臣答言白淨王太子  
名薩婆悉逢昔諸相師記其應得轉輪王位王四天

下又復記其若出家者必當成就一切種智其人今  
者來入此城外諸人民馳競來看以是之故所以誼  
鬧時頻婆娑羅王既聞此語心大歡喜踊躍徧身即  
勅一人往令伺察太子所在使者受勅尋求太子見  
在般茶婆山於一石上端坐思惟時使即歸具白太  
王王便嚴駕與諸臣民詣太子所至般茶婆山遙見  
太子相好光明踰於日月即便下馬除去儀飾及諸  
侍衛前坐問訊太子四大悉調和不我見太子心甚  
歡喜然有一悲太子本是日之種姓累世相承為轉  
輪王太子今者轉輪王相皆悉具足云何捨之來入

深山踐藉沙土遠至此也我見是故所以悲耳太子  
若以父王今在故欲不取聖王位者當以我國分半  
治之若謂爲少我當捨國盡以相奉臣事太子若復  
不取我此國者當給四兵可自攻伐取他國也太子  
所欲甚不相違爾時太子聞頻婆娑羅王說此語已  
深感其意卽答王言王之種族本是明月性自高涼  
不爲鄙事所爲所作無不清勝今發是言未足爲奇  
然我觀王中情貌至倍於前後王今便可於身命財  
修二堅法亦不應以不堅之法勸獎餘人我今旣捨  
轉輸王位亦復何緣應取王國王以善心捨國與我

猶尚不取何緣以兵伐取他國我今所以辭別父母  
剃除鬚髮捨於國者爲斷生老病死苦故非爲求於  
五欲樂也世間五欲如火聚燒諸衆生不能自出  
云何勸我貪著之也我今所以來至此者有二仙人  
阿羅邏迦蘭是求解脫最上道師欲往彼處求解脫  
道不宜久停在此也我旣違王初始之言亦懷喜  
心哉勿致嫌恨王今當以正法治國勿枉人民作此  
言已太子卽起而與王別時頻婆娑羅王見太子去  
深大惆悵合掌流淚而作是言初見太子心大踊躍  
太子旣去倍生悲苦汝今爲於大解脫故而欲去者

不敢相留唯願太子所期速果若道成者願先見度太子於是辭別而去時王奉送次於路側極目觀矚不見乃還瑞應本起云太子自去踰越名山經摩竭國界餅沙王因出遊獵遙見太子行山澤中卽與諸耆宿大臣俱追見之王曰太子生多奇異形相炳著當君四天下爲轉輪王四海顛顛莫神寶至何棄天位自放山藪必有異見願聞其志太子答曰以吾所見天地人物出生有死劇苦有三老病死痛不可得離計身爲苦器憂畏無量若在尊寵則有僣佚貪求快意天下被患此吾所厭故欲入山以修其志諸耆

宿曰夫老病死自世之常何獨預憂乃棄美號隱遁潛居以勞其形不亦難乎太子答曰如諸君言不當預憂使吾爲王老到病至若當死時寧有代吾受此厄者不如無有代乎可勿憂天下有慈父孝子愛徹骨髓至病死時不得相代若此僞身苦至之日雖居高位六親在側如爲盲人設燭何益於無目者乎吾觀衆行一切無常皆化非真樂少苦多身非已有世間虛無難得久居物生有死事成有敗安則有危得則有亡萬物紛擾皆當歸空精神無形躁濁不明行致死生之厄非直一受而已但爲貪愛蔽在癡網沒

生死河莫之能覺故吾欲一心思四空淨度色滅志  
 斷求念空無所適莫是將返其源而歸其本始出其  
 根如我願得乃可大安餅沙王喜曰善哉善哉菩薩  
 志妙世間難有必得佛道願先度我太子默然而逝  
 當度尼連禪河天為止流令水暫乾度河行數十里  
 有二梵志各與弟子索居溪邊過問其道自稱言吾  
 事梵天奉於日月日修火祠唯水是淨菩薩答曰是  
 生死法非真道也何以故水不常滿火不久熱日出  
 則移月滿則虧道在清虛水焉能令心清淨傷之而  
 去

爾時太子即便前行向彼阿羅邏仙人所住之處于  
 時諸天語仙人言薩婆悉達棄捨國土辭別父母為  
 求無上正真之道欲拔一切眾生苦故今者已來垂  
 至於此時彼仙人既聞天語心大歡喜俄爾之頃遙  
 見太子即出奉迎讚言善來俱還所住請太子坐是  
 時仙人既見太子顏貌端正相好具足諸根恬靜深  
 生愛敬即問太子所行道路得無疲也太子初生及  
 以出家又來至此我悉知之能於火聚自覺而出又  
 如大鳥於縋索中而自免脫古昔諸王盛年之時恣  
 受五欲至於根熟然後方捨國邑樂具出家學道此

未足奇太子今者捨此壯年能棄五欲遠來至此真  
 為殊特當勤精進速度彼岸太子聞已即答之曰我  
 聞汝言極為歡喜汝可為我說斷生老病死之法我  
 今樂聞仙人答言善哉善哉即便說曰眾生之始始  
 從於冥初從於冥初起於我慢從於我慢生於癡心  
 從於癡心生於染愛從於染愛生五微塵氣從五微  
 塵氣生於五大從於五大生貪欲瞋恚等諸煩惱於  
 是流轉生老病死憂悲苦惱今為太子略言之耳爾  
 時太子即便問曰我今已知汝之所說生死根本復  
 何方便而能斷之仙人答言若欲斷此生死本者先

當出家修持戒行謙卑忍辱住空閑處修習禪定離  
 欲惡不善法有覺有觀得初禪除覺觀定生入喜心  
 得第二禪捨喜心得正念具根樂得第三禪除苦樂  
 得淨念入捨根得第四禪獲無想報別有一師說如  
 此處名為解脫從定覺已然後方知非解脫處離色  
 想入空處滅有對想入識處滅無量想識唯觀一識  
 入無所有處離於種種相入非想非非想處斯處名  
 為究竟解脫是諸學者之彼岸也太子若以斷於生  
 老病死患者應當修學如此之行爾時太子聞仙人  
 言心不喜樂即自思惟其所知見非究竟處非是永

斷諸結煩惱，即便語言：我今於汝所說法中，有所未解。今欲相問，仙人答言：敬從來意。即問曰：非想非非想處，爲有我也？爲無我也？若言無我，不應言非想非非想。若言有我，我爲有知我，爲無知我？若無知，則同木石。我若有知，則有攀緣。既有攀緣，則有染著。以染著故，則非解脫。汝以盡於麤結，而不自知細結猶在，以是之故，謂爲究竟細結滋長，復受下結。以此故知，非度彼岸。若能除我，及以我想，一切盡捨，是則名爲真解脫也。仙人默然，心自思惟：太子所說甚爲深妙。爾時太子復問仙人：汝年至幾而出家也？修梵行來

復幾許年？仙人答言：我年十六而便出家，修梵行來一百四年。太子聞已，而心念言：出家已來，乃至是久，而所得法，正如此乎？于時太子爲求勝法，即從座起，與仙人別。爾時仙人語太子言：我又遠來習此苦行，而所得果，正如此耳。汝是王種，云何而能修苦行也？太子答言：汝所修法，非爲苦也。別有最苦難行之道，仙人既見太子智慧，久觀志意堅固，不虧，知決定成一切種智。白太子言：汝若道成，願先度我。於是太子答言：善哉。次至迦蘭所住之處，論議問答，亦復如是。太子即便前路而去。時二仙人見太子去，各心念言：

太子智慧深妙奇特乃爾難測合掌奉送絕視方還  
 爾時太子調伏阿羅邏迦蘭二仙人已即便前進伽  
 闍山苦行林中是憍陳如等五人所止住處即於尼  
 連禪河側靜坐思惟觀察衆生根宜應六年苦行而  
 以度之思惟是已便修苦行於是諸天奉獻麻米太  
 子為求正真道故淨心守戒日食一麻一米設有乞  
 者亦以施之爾時憍陳如等五人既見太子端坐思  
 惟修於苦行或日食一麻或日食一米或復二日乃  
 至七日食一麻米時憍陳如等亦修苦行供奉太子  
 不離其側既見此已即遣一人還白王師及以大臣

具說太子所行之事爾時王師大臣俱還宮門顏貌  
 愁悴身形萎熟猶如有人喪其所親殯送既畢抑忍  
 而歸時守門者而白王言師與大臣今在門外王既  
 聞已氣奔聲絕身首顛動時守門人解王此意即呼  
 令前王與相見悲不能言如是良久微聲而問太子  
 既是我之性命卿等今者獨作此歸我之性命云何  
 而存王師答言我奉王勅尋求太子便至跋伽仙人  
 住處訪覓太子仙人語我太子所在并說太子所言  
 之事我便前行而於中路遇見太子在於樹下端坐  
 思惟相好光明踰於日月即向太子具說大王摩訶



波闍波提及耶輸陀羅憂苦之情太子即以深重之聲而見答言我豈不知父王親戚恩情深也但畏生死別離之苦為欲斷除故來此耳如是種種言辭所說志意堅固如須彌山不可移動捨我而去如棄草芥爾時即便選擇五人隨從給侍伺察所在所遣人中有一人還說言太子當至阿羅邏迦蘭仙人之所路由恒河以天神力而得度水至王舍城時頗婆娑羅王來詣太子方便譬說不應出家分國共治及以全與并欲與兵令伐他國太子亦復皆悉不受即又前行逢仙人所而為說法降伏其心又至伽闍山苦

行林中尼連禪河側靜坐思惟日食一麻一米爾時白淨王聞師大臣說使人如此語已心大悲惱舉體顛掉身毛皆豎即語王師及大臣言太子遂捨轉輪王位父母親屬恩愛之樂遠在深山修此善行我今薄福生失如此珍寶之子王即復以使人所言向摩訶波闍波提及耶輸陀羅而為說之時白淨王即便嚴駕五百乘車摩訶波闍波提及耶輸陀羅亦復相與辦五百乘一切資生皆悉具足即喚車匿而語之言汝送太子遠放深山今復令汝領此千乘載致資糧送與太子隨時供養勿使乏少盡更來請車匿受

勅即領千乘疾速而去至太子所見形消瘦皮骨相連血脉悉現如波羅奢華頭面禮足悶絕於地良久乃起銜淚而言大王憶念太子不捨日夜今故遣我領此千乘載資生具以餉太子于時太子答車匿言我逆父母及捨國土遠來在此為求至道云何當復受此餉也爾時車匿聞此語已心自思惟太子今者既不肯受如是資供我當別覓一人領此千乘還歸王所我住於此奉事太子即差一人領車而去於是車匿密待太子不離昏晨

爾時太子心自念言我今日食一麻一米乃至七日

自餓者外道六苦  
行隨一也一自餓二  
投淵三劫火以五熱  
四自坐地坐五寂  
然六牛狗象具奴  
迦一代記四卷十七級

食一麻米身形消瘦有若枯木修於苦行垂滿六年不得解脫故知非道不如昔在閻浮樹下所思惟法離欲寂靜是最真正今我若復以此羸身而取道者彼諸外道當言自餓是般涅槃因我今雖復節節有那羅延力亦不以此而取道果我當受食然後成道作是念已即從座起至尼連禪河入水洗浴洗浴既畢身體羸瘦不能自出天神來下為捺樹枝得攀出池時彼林外有一牧牛女人名難陀波羅時淨居夫來下勸言太子今者在於林中汝可供養女人聞已心大歡喜于時地中自然而生千葉蓮華上有乳糜

女人見此生奇特心即取乳糜至太子所頭面禮足  
而以奉上太子即便受彼女施而呪願之今所施食  
欲令食者得充氣力當使施家得贍得喜安樂無病  
終保年壽智慧具足太子即復作如是言我為成熟  
一切衆生故受此食呪願訖已即受食之身體光悅  
氣力充足堪受菩提爾時五人既見此事驚而怪之  
謂為退轉各還所住菩薩獨行趣畢波羅樹自發願  
言坐彼樹下我道不成要終不起菩薩德重地不能  
勝于時步步地為震動出大音聲爾時盲聾聞地動  
響心大歡喜兩自開明曾見先佛有此瑞應作是念

已從地踊出禮菩薩足時有五百青雀飛騰虛空右  
繞菩薩雜色瑞雲及以香風而隨歎佛爾時盲聾以  
偈讚曰

|       |       |       |
|-------|-------|-------|
| 菩薩足踐處 | 地皆六種動 | 發大深遠音 |
| 我聞眼開明 | 又見虛空中 | 青雀繞菩薩 |
| 瑞雲極鮮映 | 香氣甚清涼 | 此等諸瑞相 |
| 悉同過去佛 | 以是知菩薩 | 必定成正覺 |

於是菩薩即自思惟過去諸佛以何為座成無上道  
即便自知以草為座釋提桓因化為凡人執淨輦草  
菩薩問言汝名何等答名吉祥菩薩聞之心大歡喜

我破不吉以成吉祥菩薩又言汝手中草此可得不是  
 於是吉祥即便授草以與菩薩因發願言菩薩道成  
 願先度我菩薩受已敷以為座而於草上結跏趺坐  
 如過去佛所坐之法而自誓言不成正覺不起此座  
 我亦如是發此誓時天龍鬼神皆悉歡喜清涼好風  
 從四方來禽獸息響樹不鳴條遊雲飛塵皆悉澄淨  
 知是菩薩必成道相觀佛三昧經云適施草坐地則  
 大動諸天化作八萬佛樹師子之座或有佛樹高八  
 千里或四千里一一天子各自念言菩薩坐我座上  
 不在餘座其下劣衆生本薄福者見於菩薩身坐草

蓐菩薩坐已計魔波旬最為豪尊今吾當成無上正  
 覺當感令到而降伏爾乃發起三界衆生受胎經云  
 坐閻浮樹下四十八日觀樹思惟感動天地六反震  
 動演大光明覆蔽魔宮爾時波旬臥寐夢中見三千  
 二變宮殿閻冥宮殿汗泥入於邪徑池水枯竭樂器  
 破壞閻又厭鬼頭皆墮地諸天捨去不從其教凡三  
夢文多不載從夢而起恐怖毛豎召會大臣及諸兵衆說  
 夢所見以何方便而往伏之拜召千子其五百子導  
 師等信樂菩薩其五百子惡自等隨魔所教魔王憤  
 亂告其四女一名欲妃二名悅彼三名快觀四名見

從汝往詣彼亂其淨行女詣菩薩綺語作姿三十有二姿上下唇口娑娑細視現其脰脚露其手臂作鳥鴈鴛鴦哀鸞之聲凡三十一態魔女善學女幻迷惑之業而自言曰我等年在盛時天女端正莫踰我者願得晨起夜寐供事左右菩薩答曰汝有宿福受得天身形體雖好而心不端革囊盛臭而來何為去吾不用其魔王女化成老母不能自復即還魔所觀佛三昧經云魔有三女長名悅彼中名喜心小名多媚而白父言我能往亂願父莫愁即自莊飾過踰魔后百千萬倍盼自作姿現諸妖冶禮敬菩薩旋繞七匝

白菩薩言太子生時萬神侍御何棄天位來此樹下我是天女六天無雙今以微身奉上太子我等善能調身按摩今欲親近坐樹疲極宜須偃息服食甘露即以寶器獻天甘味太子寂然身心不動以白毫擬令天之三女自見身內濃囊涕唾九孔根本生熟二藏迴伏宛轉蛹生諸蟲有八千戶走入小腸張口上向受食諸藏髓脉生蟲細於秋毫數甚衆多其女見此遂便嘔吐即自見身左生地頭右生狐頭中首狗頭背負老母抱死小兒諸女驚號却行而去低頭視齋自見女形醜狀鄙穢復有諸蟲如手釧形團藥相

持而有眾口口生五毒受食女根諸女見已心極酸  
 苦如箭入心匍匐而去吁嗟歎息至魔王所魔王大  
 怒徧勅六天并諸八部往瞿曇所是時諸鬼猶如雲  
 起或有諸鬼首如牛頭頭四十耳耳生鐵箭火燄上  
 起復有諸鬼首如狐頭有十千眼聲如霹靂曠野鬼  
 神大將軍等一頭六頭胸有六面膝頭兩面體毛如  
 箭奮身射人張眼爛赤血出流下疾走而到魔告諸  
 鬼瞿曇善人或能知呪當興四兵化作四兵列狀如  
 林甚可怖畏直從空下至道樹邊魔復更念此眾或  
 不能降伏瞿曇復脫寶冠擬地當閻羅王宮上告勅

諸鬼汝等獄卒及閻羅王阿鼻地獄刀輪劍戟火車  
 爐炭一切都舉向閻浮提魔王震吼勅諸兵眾速害  
 瞿曇上震大雷雨熱鐵丸刀輪武器交橫空中然其  
 火箭不近菩薩是時菩薩徐舉眉間毫擬阿鼻地獄  
 令罪人見白毫流水注如車軸大火暫滅自憶前世  
 所作諸罪心得清涼稱南無佛以是因緣受罪畢訖  
 直生人中魔見是相憔悴愁惱忽然還宮白毫直至  
 六天見白毫孔諸寶蓮華過去七佛在其華上如是  
 白毫上至無色徧照一切如玻黎鏡八萬四千天女  
 視波旬身狀如焦木但瞻菩薩白毫相光無數天子

天女皆發無上菩提道意時魔王自前與佛相難菩薩以智慧力伸手按地應時地動魔與官屬顛倒而墮已降魔怨成正真覺爾時菩薩在於樹下發大誓言時天龍八部皆悉歡喜於虛空中踊躍讚歎時第六天魔王宮殿自然動搖於是魔王心大懊惱精神躁擾聲味不御而自念言沙門瞿曇今在樹下捨於五欲端坐思惟不久當成正覺之道其道若成廣度一切超越我境及道未成往壞亂之爾時魔子薩陀見父慘悴而往白言不審父王何故憂感魔王答言沙門瞿曇今坐樹下其道將成超越於我今欲壞之

魔子即便前諫父言菩薩清淨超出三界神通智慧無不明了天龍八部咸共稱讚此非父王所能摧屈不煩造惡自招禍咎  
 瑞應本起云魔王不聽召二玉女一名欲妃一名悅彼三名快觀壞菩薩行時二玉女皆被羅縠之衣服天名香瓔珞珠璣極為妖冶巧媚之辭欲亂其意菩薩心淨如琉璃珠不可得汗二女復曰仁德至重諸天所敬應有供養故天獻我我等好潔年在上時天女端正莫有姝我者願得晨起夜寐供侍左右菩薩答曰汝宿有福受得天身不惟無常而作妖媚形體

雖好而心不端譬如畫餅中盛臭毒將以自壞有何等奇福難久居姪惡不善自亾其本死即當墮三惡道中受鳥獸身欲脫致難汝輩亂人正意非清淨種革囊盛屎而來何為去吾不用其二玉女化成老母不能自復魔有三女形容儀貌極端正妖冶巧媚善能惑人於天女中最為第一熏以名香佩好瓔珞一名染欲二名能悅人三名可樂三女俱前白其父言不審今者何故憂愁父即寫心而語女言世間今有沙門瞿曇身被法鎧執自在弓鏃智慧箭欲伏衆生壞我境界我若不如衆生信彼皆悉歸依我土則空

是故愁耳及未成道欲往摧挫壞其橋梁於是魔王手執強弓又持五箭男女眷屬俱時往彼畢波羅樹下見於牟尼寂然不動欲度生死三有之海爾時魔王左手執弓右手調箭語菩薩言汝刹利種死甚可畏何不速起宜應修汝轉輪王業捨出家法習於施會得生天樂此道第一先聖所行汝是刹利轉輪王種而為乞士此非所應今若不起但好安坐勿捨本誓我試射汝一放利箭苦行仙人聞我箭聲莫不驚怖昏迷失性況汝瞿曇能堪此毒汝若速起可得安全魔說此語以怖菩薩菩薩怡然而不驚不動魔王



卽便挽弓放箭并進天女菩薩爾時眼不視箭箭停空中其鏃下向變成蓮華時三天女白菩薩言仁者至德人天所敬應有供侍我等今者在盛時天女端正無踰我者天今遣我以相供給晨昏寢臥願侍左右菩薩答言汝植小善得爲天身不念無常而作妖媚形體雖美而心不端姪惑不善死必當墮三惡道中受鳥獸身免之甚難汝等今者欲亂定意非清淨心今便可去吾不相須時三天女變成老母頭白面皺齒落垂涎肉消骨立腹大如鼓拄杖羸步不能自復魔王旣見如是堅固心自思惟我昔曾於雪山

之中射摩醯首羅卽便恐懼退其善心而今不能動於瞿曇旣非此箭及我三女所能移轉令生愛恚當復更作他餘方便卽以軟語誘菩薩言汝若不樂人間受樂今者便可上昇天宮我捨天位及五欲具悉持與汝菩薩答言汝於先世修少施因今故得爲自在天王此福有期要還下生沉溺三塗出濟甚難此爲罪因非我所須魔語菩薩我之果報是汝所知汝之果報誰復知者菩薩答言我之果報唯此地知說此語已于時大地六種震動於是地神持七寶餅滿中蓮華從地踊出而語魔言菩薩昔以頭目髓腦以

施於人所出之血浸潤大地國城妻子象馬珍寶而  
 用布施不可稱計為求無上正真之道以是之故汝  
 今不應惱亂菩薩魔聞是已心生怖懼身毛皆豎時  
 彼地神禮菩薩足以華供養忽然不現  
 雜寶藏經云昔如來在菩提樹下惡魔波旬將八十  
 億眾欲來壞佛至如來所而作是言瞿曇汝獨一身  
 何能坐此急可起去若不去者我捉汝脚擲著海水  
 佛言我觀世間無能擲我著海水者汝於前世但曾  
 作一寺受一日八戒施辟支佛一鉢之食故生六天  
 為大魔王而我乃於三阿僧祇劫廣修功德初阿僧

祇劫我曾供養無量諸佛第二第三阿僧祇劫亦復  
 如是供養聲聞緣覺之人不可計數一切大地無有  
 鍼許非我身骨魔言瞿曇汝道我昔一日持戒施辟  
 支佛食信有真實我亦自知汝亦知我汝自道者誰  
 為證知佛以手指地言此地證我作是證時一切大  
 地六種震動地神即從金剛際出合掌白佛言我為  
 作證有此地來我恒在中世尊所說真實不虛佛語  
 波旬汝今先能動此澡餅然後可能擲我海水爾時  
 波旬及八十億眾不能令動魔王軍眾顛倒自墮破  
 壞星散爾時魔王即自思惟我以強弓利箭并及三

女兼以方便和言誘之不能壞亂此瞿曇心今當更設諸種方便廣集軍眾以力迫脅作是念時其諸軍眾忽然來至充滿虛空形貌各異或執戟操劍頭戴大樹手執金杵種種戰具皆悉備足或猪魚驢馬師子龍頭熊羆虎兕及諸獸頭或一身多頭或面各一目或眾多目或太腹長身或羸瘦無腹或長脚大膝或大脚肥腩或長牙利爪或頭在胷前或兩足多身或大面傍面或色如灰土或身放煙燄或象身擔山或披髮裸形或復面色半赤半白或唇垂至地或上寒覆面或身著虎皮或師子蛇皮或蛇徧纏身或頭

上火然或瞋目努臂或傍行跳擲或空中宛轉或馳步吼嚇有如是等諸惡類形不可稱數圍繞菩薩或復有欲裂菩薩身或四方煙起炎燄衝天或狂音奮發震動山谷風火煙塵暗無所見四大海水一時涌沸護法天人諸龍鬼等悉忿魔眾瞋恚增盛毛孔血流淨居天眾見此惡魔惱亂菩薩以慈悲心而愍傷之於是來下側塞虛空見魔軍眾無量無邊圍繞菩薩發大惡聲震動天地菩薩心定顏無異相猶如師子處於鹿羣皆悉歎言嗚呼奇哉未曾有也菩薩決定當成正覺是諸魔眾互相摧切各盡威力摧破菩

薩或角自切齒或橫飛亂擲菩薩觀之如童子戲魔  
 益忿怒更增戰力菩薩以慈悲力故令抱石者不能  
 勝舉其勝舉者不能得下飛刀舞劍停於空中電雷  
 雨火成五色華惡龍吐毒變成香風諸惡類形欲毀  
 菩薩不能得動魔有姊妹一名彌伽二名迦利各各  
 以手執鬪器在菩薩前作諸異狀惱亂菩薩是諸  
 魔眾種種醜身欲怖菩薩終不能動菩薩一毛魔益  
 憂愁空中有神名曰負多隱身而言我於今者見半  
 尼尊心意泰然無恐怖想是諸魔眾起於毒心於無  
 怨處而橫生忿是癡惡魔徒自疲勞永無所得今日

宜應捨恚害心汝口乃可吹須彌山令其崩倒火可  
 令冷水可令熱地性堅強可令柔軟汝不能壞菩薩  
 歷劫修習善果正思惟之精勤方便淨智慧光此四  
 功德無能斷截為作留難不成正覺如千日照必能  
 除暗鑽木得火穿地得水精勤方便無求不得世間  
 眾生沒於三毒無有救者菩薩慈悲求智慧藥為世  
 除患汝今云何而惱亂之世間眾生癡惑無智悉著  
 邪見今設法眼修習正路欲道眾生汝今云何惱亂  
 導師是則不可譬如在於曠野之中而欲欺誑商人  
 導師眾生墮太黑暗之中茫然不知所止住處菩薩

撰述  
采言卷三  
三  
書三  
爲然大智慧燈汝今云何欲吹令滅衆生今者沒生  
死海菩薩爲修智慧寶船汝今云何欲令沉溺忍辱  
爲芽堅固爲根無上大法以爲大果汝今云何而欲  
攻伐貪恚癡鎖縛諸衆生菩薩苦行欲爲解之今日  
決定於此樹下結跏趺坐成無上道此地乃是過去  
諸佛金剛之座餘方悉轉斯處不動堪受妙定非汝  
所摧汝今宜應生欣慶心息憍慢意修知識想而奉  
事之是時魔王聞空中聲又見菩薩恬然不異魔心  
慚愧捨離憍慢即便復道還歸本宮羣魔憂感悉皆  
崩散情意沮悴無復威力諸鬪戰具縱橫林野當於

惡魔退散之時菩薩心淨湛然不動天無烟霧風不  
搖條落日停光倍更明盛澄月映徹衆星燦朗幽隱  
暗冥無復障礙虛空諸天雨妙華香作衆妓樂供養  
菩薩瑞應本起云魔王益忿更召諸鬼神王合一億  
八千萬衆皆使變爲師子熊羆兕虎象龍牛馬犬豕  
猴猿之形不可稱言蟲頭人軀虺蛇之身龜龜之首  
而有六目或一頸而多頭齒牙爪距擔山吐火雷電  
四繞護持戈矛菩薩慈心不驚不怖一毛不動光顏  
益好鬼兵不能得近魔王自前與佛相難詰其辭曰  
比丘何求坐樹下  
樂於林藪毒獸間

雲起可畏窈冥冥

天魔圍繞不以驚

菩薩答曰

古正真道佛所行  
其成最勝法滿藏

恬淡為上除不明  
吾求斯坐快魔王

魔王曰

汝當作王轉金輪  
所受五欲最無比

七寶自至典四方  
斯處無道起入宮

菩薩曰

吾觀欲盛吞火銅  
得王亦有老死憂

棄國如唾無所貪  
去此無利勿妄談

魔王曰

何安坐林而大語  
不見我與四部兵  
以現猿猴師子面  
皆持刀劍獲戈矛

委國財位守空閑  
象馬步兵億八千  
虎兇毒蛇豕鬼形  
超躍哮吼滿空中

菩薩曰

設有億姦神武備  
矢刃火攻如風雨  
魔有本願令我退  
今汝福地何如佛

為魔如汝來會此  
不先得佛終不起  
吾亦自誓不虛還  
於是可知誰得勝

魔王曰

吾會終身快布施  
比丘知我宿福行

故典六天為魔王  
自稱無量誰為證

菩薩曰

昔吾行願從定光  
怒畏想盡故斯坐  
我所奉事諸佛多  
仁戒積德厚於地  
菩薩即以智慧力  
應時普地轉大動

受荊為佛釋迦文  
意定必解壞汝軍  
財寶衣食常施入  
是以脫想無患難  
伸手按地是知我  
魔與官屬顛倒墮

魔王敗績悵失利  
其子又曉心乃寤  
吾已不復用兵器  
世有兵器動人心  
若調象馬雖已調  
若得取調如佛性  
炫天見佛擒魔眾  
諸天歡喜奉華臻  
本從等意智慧力  
能使怨家為子弟

昏迷却踞前畫地  
即時自歸前悔過  
等行慈心却魔怨  
而我已等汝眾生  
然後故態會復生  
以如佛調無不仁  
忍調無想怨自降  
非法王壞法王勝  
慧能即時禳不祥  
當禮四等道之證

面如滿月，色從容。求佛相貌，難得比。

名聞十方，德如山。當稽首，斯度世仙。

釋迦譜卷第三

音釋

屹魚迄切 絡絡歷各切 釋釋夷益切 愕逆各切 嘶也  
 先齊切 貌 佇佇直呂切 待也 難難乃旦切 問也  
 馬鳴也 誼誼許元切 誼誼許元切 踐踐慈演切 藉藉地也 惆惆胡瓜切  
 惆惆丑鳩切 餅餅薄經切 糜糜忙皮切 娑娑烏莖切 娑娑烏莖切  
 好脍脍部禮切 妖妖伊消切 裝裝切 艷艷也 冷冷切 唛唛莫耕切 娑娑烏莖切 娑娑烏莖切  
 音串臂 匍匍薄胡切 匍匍薄胡切 趨趨而往也 霹霹霹普擊切 霹霹霹普擊切 劍劍切

雷之激 焦焦昨焦切 毅毅胡谷切 鍍鍍作木切 皴皴側  
 起也 皮細 迫迫博陌切 威威迫威切 力力相恐也 跳跳他弔切 猿猿波為切  
 獸名 兕兕序姊切 角角似 塞塞起虔切 跳跳他弔切 猿猿波為切  
 距距其呂切 攫攫屋號切

歸安居士嚴爾珪捐貲刻此  
 釋迦譜卷第三 計字一萬一千七百二十九  
 箇該銀五兩八錢六分五厘 伏願  
 六根雪淨三障永清即生啓悟妙心世世弘開  
 道眼龍山釋海瓊對  
 崇禎五年孟春月化城寺識



釋迦譜卷第四  
 蕭齊釋僧祐撰  
 釋迦降生釋種成佛緣譜第四之四  
 爾時菩薩以慈心力於二月七日夜降伏魔已放  
 光明即便入定思惟真諦於諸法中禪定自在悉知  
 過去所造善惡從此生彼父母眷屬貧富貴賤壽命  
 長短及名姓字皆悉明了即於衆生起大悲心而自  
 念言一切衆生無救濟者輪迴五道不知出津皆悉  
 虛偽無有真實而於其中橫生苦樂作是思惟至中  
 夜盡瑞應本起云是日初夜得一術閣自知宿命無

釋迦譜卷第四

蕭

齊

釋

僧

祐

撰

釋迦降生釋種成佛緣譜第四之四

出因果經

爾時菩薩以慈心力於二月七日夜降伏魔已放  
 光明即便入定思惟真諦於諸法中禪定自在悉知  
 過去所造善惡從此生彼父母眷屬貧富貴賤壽命  
 長短及名姓字皆悉明了即於衆生起大悲心而自  
 念言一切衆生無救濟者輪迴五道不知出津皆悉  
 虛偽無有真實而於其中橫生苦樂作是思惟至中  
 夜盡瑞應本起云是日初夜得一術閣自知宿命無

數劫已來精神所更展轉受身不可計數皆識知之  
 至二夜時得一術闍悉知衆生心中所念善惡殃福  
 生死所趣至三夜時得二術闍漏盡結解自知本昔  
 久所習行四神足念精進定欲定意定戒定變化法  
 所欲如意不復用思身能飛行能分一身作百作千  
 至億萬無數復合為一能徹入地石壁皆過從一方  
 現俯沒仰出譬如水波能中出水履水行虛身不陷  
 墜坐臥空中如飛鳥翔立能及天手捫日月涌身平  
 立至梵自在眼能徹視耳能洞聽意預知諸天人龍  
 鬼神歧行蠕動之類身行口意言心所欲念悉見聞

知諸有貪婬無貪婬者有瞋恚無瞋恚者有愚癡無  
 愚癡者有愛欲無愛欲者有大志行無大志行者有  
 內外行無內外行者有念善不念善者有一心無一  
 心者有解脫意無解脫意者一切悉知菩薩觀天上  
 人中地獄畜生鬼神五道先世父母兄弟妻子中外  
 姓字一一分別一世十世百千億萬無數世事至于  
 之天地一劫崩壞空荒之時一劫始成人物興時能  
 知十劫百劫至于千萬億無數劫中內外姓字衣食  
 苦樂壽命長短死此生彼展轉所趣從上頭始諸所  
 更身生長老終形色好醜賢愚苦樂一切三界皆分

別知見人鬼神各自隨行生五道中或墮地獄或墮畜生或作鬼神或生天上或入人形有生豪貴富樂家者有生卑鄙貧賤家者知眾生惑五陰自蔽一色像二痛癢三思想四行作五意識皆習五欲眼貪色耳貪聲鼻貪香舌貪味身貪細滑為愛欲所牽惑於財色思望安樂從是生諸惡本從惡致苦能斷愛習不隨姪心大如毛髮受行入道則終苦滅譬如無薪亦復無火是謂無為度世之道菩薩自知已棄惡本無姪怒癡生死已除根種悉斷無餘栽蘖所作已成智慧已了明星出時霍然大悟得無上正真之道為

取正覺得佛十八法有十神力四無所畏爾時菩薩既至中夜即得天眼觀察世間皆悉徹見如明鏡中自觀面像見諸眾生種類無量死此生彼隨行善惡受苦樂報見地獄中考治眾生或洋銅灌口或抱銅柱或臥鐵牀或以鐵鑊而煎煮之或以火上而加鼎炙或為虎狼鷹犬所食或有避火依於樹下樹葉墮落皆成刀劍割截其身或以斧鋸解剥肢體或擲熱沸灰河之中或復擲熱糞屎坑中受如是等種種諸苦以業報故命終不死菩薩既見如此事已而心思惟此等眾生本造惡業為世樂故而今得

果極為大苦若人有見如此惡報無復更應作不善  
 想爾時菩薩復觀畜生隨種種行受雜醜形或復有  
 為骨肉筋角皮牙毛羽而受殺者或復為人負荷重  
 擔饑渴乏極人無知者或穿其鼻或鉤其首常以身  
 肉而供於人還與其類更相食噉受於如是種種之  
 苦菩薩既見生大悲心即自思惟斯等衆生恒以身  
 力而供於人又加楚撻饑渴之苦皆是本修惡行果  
 報爾時菩薩次觀餓鬼見其恒居黑暗之中未曾暫  
 覩日月之光還是其類亦不相見受形長大腹如大  
 山咽頸若鍼口中恒有大火熾然常為饑渴之所煎

迫千億萬歲不聞食聲設值天雨灑其上者變成火  
 珠或時過臨江海河池水即化為熱銅焦炭動身舉  
 步聲如人牽五百乘車肢體節節皆悉火然菩薩既  
 見受如是等種種諸苦起大悲心而自思惟斯等皆  
 為本造慳貪積財不施故令今者受斯罪報若人見  
 彼受此苦痛宜應惠施勿生憍惜設使無財亦應割  
 肉以用布施  
 爾時菩薩次復觀人見從中陰始欲入胎父母和合  
 以顛倒想起於愛心即以不淨而為已身既處胎已  
 在於生熟二藏之間熏炙身體如地獄苦至滿十月

然後方生初生之時而為外人之所抱執麤澀苦痛  
 如被刀劒如是不久復歸老死更為嬰兒輪轉五道  
 不能自悟菩薩見已起大悲心而自思惟眾生皆有  
 如斯之患云何於中耽著五欲橫計為樂而不能斷  
 顛倒根本

爾時菩薩次觀諸天見彼天子其身清淨不受塵垢  
 如真瑠璃有大光明而日不瞬或有居在須彌山頂  
 或復居在須彌四領或復居在虛空之中心常歡悅  
 無不適事奏天美樂以自娛樂不識晝夜四方諸趣  
 無不絕妙視東耽著彌歲忘轉瞻西流洎經年不迴

乃至南北皆亦如是飲食衣服應念即至雖有如此  
 適意之事猶為欲火之所煎焦又見彼天福盡之時  
 五死相現一者頭上華萎二者眼瞬三者身上光滅  
 四者腋下汗出五者自然離於本座其諸眷屬見天  
 子身五死相現心生戀慕天子亦復自見已身有五  
 死相又見眷屬戀慕於已當爾之時生太苦惱菩薩  
 既見彼諸天子有如此事起大悲心而自思惟此諸  
 天子本修少善得受天樂果報將盡生太苦惱既命  
 終已捨彼天身或有墜於三惡道中本造善行為求  
 樂報而今所得少樂多苦譬如饑人噉雜毒食初雖

為美終成大患云何智者貪樂此也色無色界諸天  
 見壽命長便謂常樂既見變壞生大苦惱即起邪見  
 謂無因果以此事故輪迴三塗備受諸苦菩薩以天  
 眼力觀察五道起大悲心而自思惟三界之中無有  
 一樂如是思惟至中夜盡爾時菩薩至第三夜觀衆  
 生性以何因緣而有老死即知老死以生為本若離  
 於生則無老死又復此生不從天生不從自生非無  
 緣生從因緣生因於欲有色有無色有業生又觀三  
 有業從何而生即知三有業從四取生又觀四取從  
 何而生即知四取從愛而生又復觀愛從何而生即

便知愛從受而生又復觀受從何而生即便知受從  
 觸而生又復觀觸從何而生即便知觸從六入生又  
 觀六入從何而生即知六入從名色生又觀名色從  
 何而生即知名色從識而生又復觀識從何而生即  
 便知識從行而生又復觀行從何而生即便知行從  
 無明生若滅無明則行滅行滅則識滅識滅則名色  
 滅名色滅則六入滅六入滅則觸滅觸滅則受滅受  
 滅則愛滅愛滅則取滅取滅則有滅有滅則生滅生  
 滅則老死憂悲苦惱滅如是逆順觀十二因緣第三  
 夜分破於無明明相出時得智慧光斷於習障成一

切種智爾時如來心自思惟八正聖道是三世諸佛之所履行趣般涅槃路我今已踐智慧通達無所罣礙于時大地十八相動遊霞飛塵皆悉澄淨天鼓自然而發妙聲香風徐起柔軟清涼雜色瑞雲降甘露雨園林華果榮不待時又雨曼陀羅華摩訶曼陀羅華曼殊沙華摩訶曼殊沙華金華銀華瑠璃等華七寶蓮華繞菩提樹滿三十六踰闍那是時諸夫作天妓樂散華燒香歌唄讚歎執天寶蓋及以幢幡充塞虛空供養如來龍神八部所設供養亦復如是當爾之時一切衆生皆悉慈愛無瞋害想歡喜踊躍如見

聖跡無怖畏情其心調柔離憍慢意亦無慳嫉諂誑之心五淨居天離喜樂根亦皆歡悅不能自勝地獄苦痛暫得休息生大歡喜一切畜生相食噉者無復惡心餓鬼飽滿無饑渴想世界之中幽暝之處日月威光所不能照而皆大明其中衆生悉得相見各作是言此中云何忽有衆生大聖法王出興於世以太法光破非法暗故令一切皆悉明朗甘蔗先王棄國學道得五通仙又行十善得生天者皆乘神通到菩提樹在虛空中歡喜合掌而讚歎言於我甘蔗種族之中能斷諸漏成一切智為世間眼甚為奇特一切

人天莫不歡喜踊躍無量唯有魔王心猶憂愁

爾時如來於七日中一心思惟觀於樹王而自念言  
我在此處盡一切漏所作已竟本願成滿我所得法  
甚深難解唯佛與佛乃能知之一切眾生於五濁世  
為貪欲瞋恚愚癡邪見憍慢諂曲之所覆障薄福鈍  
根無有智慧云何能解我所得法今我若為轉法輪  
者彼必迷惑不能信受而生誹謗當墮惡道受諸苦  
痛我寧默然入般涅槃爾時如來以偈頌曰

聖道甚難登 智慧果難得 我於此難中  
皆悉已能辦 我所得智慧 微妙寂第一

眾生諸根鈍

著樂癡所盲

順於生死流

不能返其源

如斯之等類

云何而可度

爾時如來作是念已大梵天王見於如來聖果已成  
默然而住不轉法輪心懷憂惱即自念言世尊昔於  
無量億劫為眾生故久在生死捨國城妻子頭目髓  
腦備受眾苦始於今者所願滿足成阿耨多羅三藐  
三菩提云何默然而不說法眾生長夜沉沒生死我  
今當往請轉法輪作是念已即發天宮猶如壯士屈  
伸臂頃至如來所頭面禮足繞百千匝却住一面胡  
跪合掌而白佛言世尊往昔為眾生故久住生死捨



身頭目以用布施備受諸苦廣修德本始於今者成  
 無上道云何默然而不說法衆生長夜沒溺生死墮  
 無明暗出斯甚難然有衆生過去世時親近善友植  
 諸德本堪任聞法受於聖道唯願世尊為斯等故以  
 大悲力轉妙法輪釋提桓因乃至他化自在天亦復  
 如是勸請如來為諸衆生轉大法輪

爾時世尊答大梵王及釋提桓因等言我亦欲為一  
 切衆生轉於法輪但所得法微妙甚深難解難知諸  
 衆生等不能信受生誹謗心墮於地獄我今為此故  
 默然耳時梵天王等乃至三請爾時如來至滿七日

默然受之梵天王等知佛受請頭面禮足各還所住  
 賢愚經云佛在摩竭國善勝道場初始得佛念諸衆  
 生迷網邪倒難可教化若我住世於事無益不如遷  
 逝無餘涅槃爾時梵天知佛所念即從天下前詣佛  
 所頭面禮足長跪合掌勸請世尊轉于法輪佛答梵  
 天衆生之類塵垢所蔽樂著世樂無有慧心若我住  
 世唐勞其功如吾所念唯滅為快爾時梵天復更傾  
 側而白佛言世尊今日法海已滿法幢已立潤濟開  
 導今正是時又諸衆生應可度者亦甚衆多云何世  
 尊欲入涅槃使此萌類永失覆護世尊先昔無數劫

時恒為衆生采集法樂乃至一偈以身妻子而用募求云何不念便欲孤棄過去久遠於閻浮提作大國王號脩樓婆領此世界八萬四千諸小國邑六萬山川八十億聚落王有二萬夫人一萬大臣時妙色王德力無比覆育民物豐樂無極王心念曰如我今者唯以財寶資給一切無有道教而安立之此是我答何其苦哉今當推求堅實法財普令得服即時宣令閻浮提內誰能有法與我說者恣其所得不敢違逆募出周徧無有應者時王憂愁酸切懇惻毗沙門王見其如是欲往試之轉自變身化作夜叉色貌青黑

眼赤如血狗牙上出頭髮悉豎火從口出來詣宮門口自宣言誰欲聞法我當為說王聞是語喜不自勝躬自出迎前為作禮敷施高座請令就坐即集羣僚前後圍繞欲得聽聞爾時夜叉復告王曰學法事難云何直爾欲得聞知王叉手曰一切所須不敢有逆夜叉報曰若以太王可愛妻子與我食者乃可與法爾時大王以所愛夫人及兒中勝者供養夜叉夜叉得已於高座上衆會之中取而食之爾時諸王百官羣臣見王如是啼哭懊惱宛轉在地勸請大王令捨此事王為法故心堅不迴時夜叉鬼食妻子盡為說

一偈

一切行無常 生者皆有苦 五陰空無相

無有我我所

說是偈已王大歡喜心無悔恨大如毛髮即使盡寫遣使頒示閻浮提內咸使誦習世尊往昔為於衆生不顧身命乃至如是今者世尊法海已滿法幢已立法鼓已建法炬已照潤益成立今正得時云何欲捨一切衆生入於涅槃而不說法爾時梵王於如來前合掌讚歎說於如來先身求法為於衆生凡有千首世尊爾時受梵王請即便往詣波羅柰國鹿野苑中

轉于法輪三寶因是乃現於世時諸天人諸龍鬼神八部之衆聞說是已莫不歡喜普曜經云如來具足成正覺已移坐石室自念本願欲度衆生思惟生死世間道術九十六種各信所事孰知其惑天地無常皆悉大苦誰能信者意欲默然不為說法便入定意時天帝釋知佛不欲說法悲念三界即將般遮下到石室鼓琴歌佛本願請說不死之法佛隨俗心是法甚深非心所思非言可暢即說偈言

深奧恬怕 明耀無垢 吾以遂是 甘露無為  
今我說之 衆人不解 如吾今日 不如默然

除去言辭 無思無得 如是自然 猶如虛空  
 時識伽梵王與六萬八千梵來到佛所白佛言天地  
 無祐今欲毀壞佛不說法眾苦沉滯沒於三界願轉  
 法輪悉救眾生佛默可之時有樹神名曰法明又名  
 法樂又名法意又名持法白佛言世尊當於何處而  
 轉法輪佛言在波羅奈仙人住處鹿苑之中人民雖  
 少我宿命時在中建立法祠六萬億載在中供養六  
 萬億諸佛諸仙人等遊居其中以佛道眼普觀世間  
 今當為誰第一說法何人易化姪怒癡薄鬱曇藍弗  
 三垢少薄身故已來已經七日第二學仙今日壽終

佛復念言昔父王遣五人俱侍衛我經歷勤苦我今  
 寧可為其先說

爾時世尊從樹下起尋時舉聲告於三千大千世界  
 皆使知之至波羅奈詣五人所於是五人遙見佛來  
 轉相謂言沙門瞿曇迷失無定所志不獲假使來者  
 慎莫為起亦勿迎逆彼時五人遙見佛到不能堪任  
 不安所坐即起歸敬

爾時地神暢聲告已即為立座頒宣廣說十二因緣  
 拘隣者知 佛法聖眾即成三寶各暢天下音徹梵天  
 本際也 俱隣五人六十億天八十億色界天八萬世人得法

眼淨

爾時世尊受梵王等請已又於七日而以佛眼觀諸  
衆生上中下根及諸煩惱亦下中上滿一七日爾時  
世尊又復思惟我今當開甘露法門誰應在先而得  
聞者阿羅邏仙人聰慧易悟又先發願道成度我作  
是念時空中有言阿羅邏仙人昨夜命終爾時世尊  
即便答彼空中聲音我亦知其昨夜命終又自思惟  
迦蘭仙人利根明了亦應先聞空中又言迦蘭仙人  
昨夜命終爾時世尊即以答言我亦知其昨夜命終  
爾時世尊又自思惟彼王師大臣所遣僑陳如等五

人瞻視我者皆悉聰明又過去世於我發願應先聞  
法我今宜當爲此五人先開法門又自思惟古昔諸  
佛轉法輪處皆悉在於波羅柰國鹿野苑中仙人住  
處又此五人所止住處亦在於彼我今應往至其住  
處轉大法輪思惟是已即從座起詣波羅柰國爾時  
有五百商人二人爲主一名跋陀羅斯那二名跋陀  
羅梨行過曠野時有天神而語之言有如來應正徧  
知明行足善逝世間解無上士調御丈夫天人師佛  
世尊出興於世最上福田汝今宜應最前設供時彼  
商人聞天語已即答之曰善哉如告又問天言世尊

今者爲在何許天又報言世尊不久當來至此於是  
如來於無量諸天前後導從到多謂娑跋利村時彼  
村人既見如來威相莊嚴又見諸天前後圍繞倍生  
歡喜卽以蜜麩而奉上佛爾時世尊心自思惟過去  
諸佛用鉢多羅而以盛食時四天王知佛心念各持  
一鉢來至佛所而以奉上於是世尊而自念言我今  
若受一王鉢者餘王必當生於恨心卽便普受四王  
之鉢累置掌上按令成一使四際相現爾時世尊卽  
便咒願今所布施欲令食者得充氣力當令施者得  
色得力得瞻得喜安快無病終保年壽諸善鬼神恒

隨守護開示道地得利諸偶吉無不利日月五星二  
十八宿天神鬼王常隨護助四天王賞別善人飯  
食布施斷三毒根將來當獲三堅法報聰明智慧篤  
信佛法在在所生正見不昧現世之中父母妻子親  
戚眷屬皆悉熾盛無諸災恠不吉祥事門族之中若  
有命過墮惡道者當令以今所施之福還生人天不  
起邪見增進功德常得奉近諸佛如來得聞妙說見  
諦得證所願具足爾時世尊咒願訖已卽便受食食  
既畢竟澡漱洗鉢卽授商人三歸一歸依佛二歸依  
法三歸依當來僧授三歸竟因與之別瑞應本起云

佛定意七日不動不搖樹神念佛新得道快坐已七日未有獻食者我當求人令獻佛食時有五百賈人從山一面過車牛皆躓礙不行中有兩大人一名提謂二名波利佈還與眾人俱詣樹神請福神現光像言今世有佛在此優留國界尼連禪水邊未有獻食者汝曹幸先能有善意必獲大福賈人聞佛名皆喜言佛必獨大尊天神所敬非凡品也即和麩蜜俱詣樹下稽首上佛佛念先古諸佛哀受人施法皆持鉢不宜如餘道人手受食也四天主即遙知佛當用鉢如人屈伸臂頃俱到頽那山上如意所念石中自然

出四鉢香潔無穢四天王各取一鉢還共上佛願哀賈人令得大福方有鐵鉢後弟子當用食佛念取一鉢不快餘主意便悉受四鉢累置左手中右手按之合成一鉢令四際現而便前行威儀詳序步若鷲王路逢外道名優波伽既見如來相好莊嚴諸根寂定歎為奇特即說偈言

|       |       |       |
|-------|-------|-------|
| 世間諸衆生 | 皆為三毒縛 | 諸根又輕躁 |
| 馳蕩於外境 | 而今見仁者 | 諸根極寂靜 |
| 必到解脫地 | 決定無有疑 | 仁者所學師 |
| 其姓字何等 |       |       |

爾時世尊以偈答曰

我今已超出一切衆生表

微妙深遠法

我今已具足三毒五欲境

永斷無餘習

如蓮華在水不染濁水泥

自悟入正道

無師無等侶如清淨智慧

降伏大力魔

今得成正覺堪爲天人師

身口意滿足

故號爲牟尼欲趣波羅柰

轉甘露法輪

是天人魔梵所不能轉

爾時優波伽聞此偈言心生歡喜歎未曾有合掌恭敬圍繞而去迴顧瞻矚不見乃去爾時世尊即復前行

行次到阿闍婆羅水側日暮止宿而便入定當於爾

時七日風雨時彼水中有大龍王名曰真隣陀見佛

人定即以其身圍繞七匝滿七日已時彼龍王化爲

人形頭面禮足而白佛言世尊在此七日之中不至

乃甚患風雨也爾時世尊以偈答曰

諸天及世人所歡五欲樂 比我禪定樂

不可爲譬類

時彼龍王聞佛此偈歡喜踊躍頭面禮足還歸所止

瑞應本起云起到文隣盲龍無提水邊坐定七日不

喘不息光照水中龍目得開即識如來如前三佛光



明目輒得視龍王歡喜沐浴名香栴檀蘇合出未見  
 佛相好光影如樹有華前繞佛七市身離佛圍四十  
 里龍有七頭羅覆佛上欲以障蔽蚊蚤寒暑時雨七  
 日龍一心不饑不渴七日雨止佛從定寤龍化作年  
 少道人著好服飾稽首問佛佛得無寒得無熱無為  
 蚊蚤所燒近耶佛時答言

久得在屏處 思道其福快 昔所願欲聞  
 今已悉知快 不為彼所燒 能安衆生快  
 度世三毒滅 得佛泥洹快 生世得親佛  
 聞受經法快 得與辟支佛 真人會亦快

不與愚從事 得離惡人快 有黠別真偽  
 知信正道快

佛告龍王汝當復自歸於佛自歸於法自歸於比丘  
 僧即受三自歸諸畜生中是龍為先見佛  
 爾時世尊即復前往波羅柰國至憍陳如摩訶那摩  
 跋波阿捨婆闍跋陀羅闍所止住處時彼五人遙見  
 佛來共相謂言沙門瞿曇棄捨苦行而還退受飲食  
 之樂無復道心今既來此我等不須起迎之也亦勿  
 作禮敬問所須為敷坐處若欲坐者自隨其意作此  
 語竟而各默然爾時世尊既來至已五人不覺各從

座起禮拜奉迎互為執事或復有為持衣鉢者或有  
 取水供盥漱者或復有為灑洗脚者各違本誓猶故  
 稱佛以為瞿曇爾時世尊語憍陳如言汝等共約見  
 我不起今者何故違先所誓而即驚起為我執事時  
 彼五人聞佛此言深生慚愧即前白言瞿曇行道得  
 無疲倦爾時世尊語五人言汝等云何於無上尊而  
 以高情稱喚姓也我心如空於諸毀譽無所分別但  
 汝憍慢自招惡報譬如子稱父母名於世儀中猶  
 尚不可況我今是一切父母時彼五人又聞此語倍  
 生慚愧而白佛言我等愚癡無有慧識不知今者已

成正覺所以者何往見如來日食麻米苦行六年而  
 今還受飲食之樂我以是故謂不得道爾時世尊語  
 憍陳如言汝等莫以小智輕量我道成與不成何以  
 故形在苦者心則惱亂身在樂者情則樂著是以苦  
 樂兩非道因譬如鑽火澆之以水則必無有破暗之  
 照鑽智慧火亦復如是若有苦樂水慧光不生以不生  
 故不能滅於生死黑障今者若能棄捨苦樂行於中  
 道心則寂定堪能修彼八正聖道離於生老病死之  
 患我已隨順中道之行得成阿耨多羅三藐三菩提  
 時彼五人既聞如來如此之言心大歡喜踊躍無量

瞻仰尊顏目不暫捨爾時世尊觀五人根堪任受道而語之言憍陳如汝等當觀五盛陰苦生苦老苦病苦死苦愛別離苦怨憎會苦所求不得苦失榮樂苦憍陳如有形無形無足一足二足四足多足一切眾生無不悉有如此苦者譬如以灰覆於火上若遇乾草還復燒然如是諸苦由我為本若有眾生起微我想還復更受如此之苦貪欲瞋恚及以愚癡皆悉緣我根本而生又此三毒是諸苦因猶如種子能生於芽眾生以是輪迴三有若滅我想及貪瞋癡諸苦亦皆從此而斷莫不悉由彼入正道如人以水澆於盛

火一切眾生不知諸苦之根本者皆悉輪迴在於生死憍陳如苦應知集當斷滅應證道當修憍陳如我已知苦已斷集已證滅已修道故得阿耨多羅三藐三菩提是故汝今應當知苦斷集證滅修道若人不知四聖諦者當知是人不得解脫四聖諦者是真是實苦實是苦集實是集滅實是滅道實是道憍陳如汝等解味憍陳如言解已世尊知已世尊以於四諦得解知故故名阿若憍陳如當三轉四諦十二行法輪時阿若憍陳如於諸法中遠塵離垢得法眼淨時虛空中八萬那由他諸天亦離塵垢得法眼淨

爾時地神見於如來在其境界而轉法輪心大歡喜  
高聲唱言如來於此轉妙法輪虛空天神既聞此言  
又生踊躍展轉唱聲乃至阿迦膩吒天諸天聞已欣  
悅無量高聲唱言如來今日於波羅柰國鹿野苑中  
仙人住處轉大法輪一切世間天人魔梵沙門婆羅  
門所不能轉爾時大地十八相動天龍八部於虛空  
中作衆妓樂天鼓自鳴燒衆名香散諸妙華寶幢旛  
蓋歌頌讚歎世界之中自然大明阿若憍陳如於弟  
子中以始悟故爲第一弟子時彼摩訶那摩等四人  
聞佛轉法輪已阿若憍陳如獨悟道跡心自念言世

尊者更爲我說法我等亦當復得悟道作此念已瞻  
仰尊顏目不暫捨爾時世尊知四人念即便重爲廣  
說四諦于時四人於諸法中亦離塵垢得法眼淨時  
彼五人見道跡已頂禮佛足而白佛言世尊我等五  
人已見道跡已證道跡我等今者欲於佛法出家修  
道唯願世尊慈愍聽許於時世尊喚彼五人善來比  
丘鬚髮自落袈裟著身卽成沙門爾時世尊問彼五  
人汝等比丘知色受想行識爲是常爲無常也爲是  
苦爲非苦也爲是空爲非空也爲有我爲無我也時  
五比丘聞佛說是五陰法已漏盡意解成阿羅漢果

卽便答言世尊色受想行識實是無常苦空無我於是世間始有六阿羅漢佛阿羅漢是爲佛寶四諦法輪是爲法寶五阿羅漢是爲僧寶如是世間三寶具足爲諸夫人第一福田

爾時有長者子名曰耶舍聰明利根極大巨富閻浮提中最爲第一服天冠瓔珞著無價寶屐其於中夜與諸妓女相娛樂已各還寢息忽從眠覺見諸妓女或有伏臥或有仰眠頭髮鬢亂涎唾流出樂器服玩顛倒縱橫既見是已生厭離心而自念言我今在此災恠之內於不淨中妄生淨想作是念時以天力故

空中光明門自然開尋光而去趣鹿野苑路由恒河高聲唱言苦哉苦哉佛言耶舍汝便可來我今此有離苦之法耶舍聞已所著寶屐價直閻浮提卽便脫之度於恒河往詣佛所見三十二相八十種好顏容挺特威德具足心大歡喜踴躍無量五體投地頂禮佛足唯願世尊救濟於我佛言善哉善哉善男子諦聽諦聽善思念之如來卽便隨順其根而爲說法耶舍色受想行識無常苦空無我汝知之不是時耶舍聞說此語卽於諸法遠塵離垢得法眼淨於是如來重說四諦漏盡意解心得自在成阿羅漢果卽答佛

言世尊色受想行識實是無常苦空無我爾時如來猶見耶舍著嚴身具卽說偈言

|       |       |       |
|-------|-------|-------|
| 雖復處居家 | 服寶嚴身具 | 善攝諸情根 |
| 厭離於五欲 | 若能如此者 | 是為真出家 |
| 身雖在曠野 | 服食於麤澀 | 意猶貪五欲 |
| 是為非出家 | 一切造善惡 | 皆從心想生 |
| 是故真出家 | 皆以心為本 |       |

爾時耶舍既見如來說此偈已心自念言世尊所以說此偈者正當以我猶著七寶我今宜應脫如此服卽便禮足而白佛言唯願世尊聽我出家佛言善來

比丘鬚髮自落袈裟著身卽成沙門爾時耶舍父既至天曉求覓耶舍不知所在心大懊惱悲號涕泣緣路推尋到恒河側見其子履心自思惟我子正當從此道去卽尋其跡至於佛所爾時世尊知其為子故來至此若使卽得見耶舍者必生大苦或能命終便以神力隱耶舍身其父卽便前到佛所頭面禮足退坐一面於是如來卽隨其根而為說法善男子色受想行識無常苦空無我汝知之不時耶舍父聞說此言卽於諸法遠塵離垢得法眼淨而答佛言世尊色受想行識實是無常苦空無我爾時如來既已知其

見於道跡恩愛漸薄而問之。言汝何因緣而來至此。其卽答言我有一子名曰耶舍。昨夜之中忽失所在。今日推求見其寶屐在恒河側。追尋之跡。故來至此。爾時世尊攝其神力。其父卽便得見耶舍。心大歡喜。語耶舍言善哉善哉。汝爲此事。真實快也。旣能自度。又能度他。汝今在此。故令我來得見道跡。卽於佛前。受三自歸。於是閻浮提中。唯此長者爲優婆塞。最初獲得供養三寶。爾時又有耶舍。朋類五十長者。子聞佛出世。又聞耶舍於佛法中出家修道。各自念言。世間今者有無上尊長者子耶舍。聰慧辯了。才藝兼人。

乃能捨其豪族。棄五欲樂。毀形守志。而爲沙門。我等今者復何顧戀。不出家也。作是念已。共詣佛所未至之間。遙見如來相好殊特。光明赫奕。心大歡喜。舉體清涼。敬情轉至。卽前佛所。合掌圍繞。頭面禮足。諸長者子。宿植德本。聰達易悟。如來卽便隨其所應。而爲說法。善男子。色受想行識。無常苦空無我。汝知之不說此語已。諸長者子於諸法中。遠離塵垢。得法眼淨。卽答佛言。世尊。色受想行識。實是無常苦空無我。唯願世尊聽我出家。佛言善來比丘。鬚髮自落。袈裟著身。卽成沙門。爾時世尊又爲廣說四諦。時五十比丘。

漏盡意解得阿羅漢果爾時始有五十六阿羅漢是時如來告諸比丘汝等所作已辦堪為世間作上福田宜各遊方教化以慈悲心度諸衆生我今亦當獨往摩竭提國王舍城中度諸人民諸比丘言善哉世尊爾時比丘頭面禮足各持衣鉢辭別而去爾時世尊即便思惟我今應度何等衆生而能廣利一切人天唯有優樓頻螺迦葉兄弟三人在摩竭提國學於仙道國王臣民皆悉歸信又其聰明利根易悟然其我慢亦難摧伏我今當往而度脫之思惟是已即發波羅柰趣摩竭提國日將昏暮往優樓頻螺

迦葉住處于時迦葉忽見如來相好莊嚴心大歡喜而作是言年少沙門從何而來佛即答言我從波羅柰國當詣摩竭提日既晚暮欲寄一宿迦葉又言寄宿止者甚不相違但諸房舍悉弟子住唯有石室極為潔淨我事火具皆在其中此寂靜處可得相容然有惡龍居在其內恐相害耳佛又答言雖有惡龍但以見借迦葉又言其性兇暴必當相害非是有惜佛又答言但以見借必無辱也迦葉又言若能住者便自隨意佛言善哉即於其夕而入石室結跏趺坐而入三昧爾時惡龍毒心轉盛舉體烟出世尊即入火



光三昧龍見是已火燄衝天焚燒石室迦葉弟子先見此火而還白師彼年少沙門聰明端嚴今爲龍火之所燒害迦葉驚起見彼龍火心懷悲傷卽勅弟子以水澆之水不能滅火更熾盛石室融盡爾時世尊身心不動容顏怡然降彼惡龍使無復毒授三歸依置於鉢中至天明已迦葉師徒俱往佛所年少沙門龍火猛烈將無爲此之所傷也沙門借室我昨所以不相與者正爲此耳佛言我內清淨終不爲彼外災所害彼毒龍者今在鉢中卽便舉鉢以示迦葉迦葉師徒見於沙門處火不燒降伏惡龍置於鉢中歎未

曾有語弟子言年少沙門雖復神通然故不如我道真也

爾時世尊語迦葉言我今方欲停止此處迦葉答言善哉隨意是時如來於第二夜坐一樹下時四天王夜來佛所而共聽法各放光明照喻日月迦葉夜起遙見天光在如來側語弟子言年少沙門亦事於火至明日曉往詣佛所問言沙門汝事火也佛言不也有四天王夜來聽法是其光耳於是迦葉語弟子言年少沙門有大神德然故不如我道真也至第二夜釋提桓因來下聽法放大光明如日初昇迦葉弟子

支那 歸世尊意旨 三四

遙見天光在如來側而白師言年少沙門定事火也  
至於明白往詣佛所問沙門言汝定事火佛言不也  
釋提桓因來下聽法是其光耳于時迦葉語弟子言  
年少沙門神德雖盛然故不如我道真也至第四夜  
大梵天王來下聽法放大光明如日正中迦葉夜起  
見有光明在如來側沙門必定事於火也明日問佛  
汝定事火佛言不也大梵天王夜來聽法是其光耳  
於是迦葉心自念言年少沙門雖復神妙然故不如  
我道真也爾時迦葉五百弟子各事三火於晨朝時  
俱欲然火火不肯然皆向迦葉具說此事迦葉聞已

心自思惟此必當是沙門所爲即與弟子來至佛所  
而白佛言我諸弟子各事三火且欲然之而火不然  
佛即答言汝可還去火自當然迦葉便還見火已然  
心自念言年少沙門雖復神妙然故不如我道真也  
諸弟子衆供養火畢而欲滅之不能令滅即向迦葉  
具說此事迦葉聞已心自思惟此亦當是沙門所爲  
即與弟子來至佛所而白佛言我諸弟子朝欲滅火  
而火不滅佛即答言汝可還去火自當滅迦葉便歸  
見火已滅心自念言年少沙門雖復神妙然故不如  
我道真也爾時迦葉自事三火晨朝欲然火不肯然

卽自思惟此必復是沙門所爲卽往佛所而白佛言  
 我朝然火而不肯然佛卽答言汝可還去火自當然  
 迦葉便歸見火已然心自念言年少沙門雖復神妙  
 然故不如我道真也於時迦葉供養火畢而欲滅之  
 不能令滅心自思惟此必當是沙門所爲卽往佛所  
 而白佛言我朝然火今欲滅之而不肯滅佛卽答言  
 汝可還去火自當滅迦葉便歸見火已滅心自念言  
 年少沙門雖復神妙然故不如我道真也瑞應本起  
 云迦葉復念是大沙門神則神矣然未得道不如我  
 得羅漢爾時迦葉諸弟子衆晨朝破薪斧不肯舉卽

向迦葉具說此事迦葉聞已心自思惟此必復是沙  
 門所爲卽與弟子來至佛所而白佛言我諸弟子晨  
 朝破薪斧不肯舉佛卽答言汝可還去斧自當舉迦  
 葉便歸見諸弟子斧皆得舉而自念言年少沙門雖  
 復神妙然故不如我道真也迦葉弟子卽得舉斧復  
 不肯下還向迦葉具說此事迦葉聞已心自思惟此  
 亦當是沙門所爲卽與弟子往至佛所而白佛言我  
 諸弟子旦欲破薪斧旣得舉復不肯下佛卽答言汝  
 可還去當令斧下迦葉還歸見諸弟子斧皆得下心  
 自念言年少沙門雖復神妙然故不如我道真也爾

時迦葉於晨朝時自欲破薪斧不得舉心自思惟此亦當是沙門所爲卽詣佛所而白佛言我且破薪斧不肯舉佛卽答言汝可還去斧自當舉迦葉旣還斧卽得舉心自念言年少沙門雖復神妙然故不如我道真也迦葉斧旣舉已復不肯下心自思惟此亦當是沙門所爲卽詣佛所而白佛言我斧已舉復不肯下佛卽答言汝可還去斧自當下迦葉卽歸斧卽得下心自念言年少沙門雖復神妙然故不如我道真也爾時迦葉卽白佛言年少沙門夏止住此共修梵行房舍衣食我當相給于時世尊默然許之迦葉知

佛許已還其所住卽勅日日辦好飲食并施牀座至明食時自行請佛佛言汝去我隨後往迦葉適去俄爾之間世尊卽便至閻浮洲界取閻浮果滿鉢持來迦葉未至佛已先到迦葉後來見佛已坐卽便問言年少沙門從何道來而先至此佛以鉢中取閻浮果以示迦葉而語之言汝今識此鉢中果不迦葉答言不識此果佛言從此南行數萬踰闍那彼有一洲其上有樹名曰閻浮緣有此樹故言閻浮提我此鉢中是彼果也於一念頃取此果來極爲香美汝可噉之於是迦葉心自思惟彼道去此極爲長遠而此沙門

乃能俄爾已得還往神通變化殊自迅疾然故不如  
 我道真也普耀經云迦葉適去佛以神足上忉利天  
 取晝度果神足南行數千萬里極閻浮提界上取訶  
 梨勒果餘三天下皆亦如是文多不載迦葉曰從何道來佛言卿每  
 去後吾至四域及上忉利天中取此果來香美可食  
 卿可食之瑞應本起云明日食時迦葉請佛佛言便  
 去今隨後往佛南行極閻浮提界上數千萬里取訶  
 梨勒果盛滿鉢還迦葉未歸佛已坐其牀迦葉至問  
 何緣先到佛言卿適去我即行此地界取訶梨勒果  
 亦香且美便取食之佛飯已去迦葉續念是大沙門

雖神不如我道真也迦葉即便下種種食佛即呪願  
 婆羅門法中 奉事火為最 一切眾流中  
 大海為其最 於諸星宿中 月光為其最  
 一切光明中 日光為其最 於諸禳田中  
 佛福田為最 若欲求大果 當供佛福田  
 佛食已訖還歸所住洗鉢漱口坐於樹下明日食時  
 復往請佛佛言汝去我隨後往迦葉適去俄爾之間  
 世尊即便至弗婆提取菴摩羅果滿鉢持來迦葉未  
 至佛已先到迦葉後來見佛已坐即便問言年少沙  
 門從何道來而先至此佛以鉢中菴摩羅果以示迦

葉而語之言汝今識此鉢中果不迦葉答言不識此  
 果佛言從此東行數萬踰闍那到弗婆提取此果來  
 名菴摩羅極為香美汝可食之迦葉聞已心自念言  
 彼道去此極為長遠而此沙門乃能俄爾已得往還  
 觀其神化所未曾有然故不如我道真也迦葉即便  
 下種種食佛即呪願

婆羅門法中

奉事火為最

一切眾流中

大海為其最

於諸星宿中

月光為其最

一切光明中

日光為其最

於諸福田中

佛福田為最

若欲求大果

當供佛福田

佛食已畢還歸所止洗鉢漱口坐於樹下明日食時  
 復往請佛佛言汝去我隨後往迦葉適去俄爾之間  
 世尊便即至瞿陀尼取訶梨勒果滿鉢持來迦葉未  
 至佛已先到迦葉後來見佛已坐即便問言年少沙  
 門從何道來而先至此佛以鉢中訶梨勒果以示迦  
 葉而語之言汝今識此鉢中果不迦葉答言不識此  
 果佛言從此西行數萬踰闍那到瞿陀尼取此果來  
 名阿梨勒極為香美汝可食之迦葉聞已心自念言  
 彼道去此極為長遠而此沙門乃能俄爾已得往還  
 觀其神通所未曾有然故不如我道真也迦葉即便

下種種食佛即呪曰

婆羅門法中 奉事火為最 一切眾流中

大海為其最 於諸星宿中 月光為其最

一切光明中 日光為其最 於諸福田中

佛福田為最 若欲求大果 當供佛福田

佛食已訖還歸所止洗鉢漱口坐於樹下明日食時

復往請佛佛言汝去我隨後往迦葉適去俄爾之間

世尊即便至鬱單越取自然粳米飯滿鉢持來迦葉

未至佛已先到迦葉後來見佛已坐即便問言年少

沙門從何道來而先至此佛以鉢中粳米飯以示迦

葉而語之言汝今識此鉢中飯不迦葉答言不識此

飯佛言從此北行數萬踰闍那到鬱單越取此自然

粳米飯來極為香美汝可食之迦葉聞已心自念言

彼道去此極為長遠而此沙門乃能俄爾已得往還

雖復神通難可測量然故不如我道真也迦葉即便

下種種食佛即呪曰

婆羅門法中 奉事火為最 一切眾流中

大海為其最 於諸星宿中 月光為其最

一切光明中 日光為其最 於諸福田中

佛福田為最 若欲求大果 當供佛福田

佛食畢已還歸所止洗鉢漱口坐於樹下明日食時復往請佛佛言善哉即共俱行既到其舍下種種食佛即呪願

婆羅門法中 奉事火為最 一切眾流中

大海為其最 於諸星宿中 月光為其最

一切光明中 日光為其最 於諸福田中

佛福田為最 若欲求大果 當供佛福田

爾時世尊呪願已畢即便取食獨還樹下食竟心念須水釋提桓因即知佛意如大壯士屈伸臂項從天下來到於佛前頭面禮足即便以手指地成池其水

清涼具八功德如來即便得而用之澡漱既畢為釋提桓因說種種法釋提桓因既聞法已歡喜踊躍忽然不現還歸天宮是時迦葉於中食後林間經行心自念言年少沙門今日受食還歸樹下我當往彼而看觀之即詣佛所忽見樹側有一大池泉水澄淨具八功德恠而問佛此中云何忽有此池佛即答言且受汝供還歸此食食訖須水澡漱洗鉢釋提桓因知我此意從天上來以手指地而成此池爾時迦葉既見池水復聞佛言心自思惟年少沙門有大威德乃能如此感致天瑞然故不如我道真也





玩切澡手也漱蘇奏切盪口也**鬚**薄紅切**展**竭戟切木展也**澀**所立切

歸安居士嚴爾珪捐貲刻此

釋迦譜卷第四計字一萬二千四百九十六

筒該銀六兩二錢四分八厘伏願

大根雪淨三障冰清即生啓悟妙心世世弘開

道眼龍山釋海瓊對

崇禎五年孟春月徑山化城寺識



